

Ruang dah 'terbuka'

Harian metro 30/6/2022 (page 6)

KKM jangka kegiatan doktor gigi palsu meningkat susulan endemik

Oleh Zatul Iffah Zolkipli
zatuliffah@hmetro.com.my

Kuala Nerus

Kementerian Kesihatan Malaysia (KKM) menjangka kegiatan doktor gigi palsu atau tidak bertauliah kembali meningkat selepas peralihan negara ke fasa endemik.

Pengarah Kanan (Kesihatan Pergigian) KKM Dr Noormi Othman berkata, pembukaan semula sektor ekonomi dan kebenaran rentas negeri memberi ruang kepada mereka kembali beroperasi selepas ia tertangguh susulan pandemik Covid-19.

Menurutnya, kebanyakan doktor gigi palsu atau pengamal perubatan haram menawarkan perkhidmatan secara bergerak dengan promosi di media sosial.

"Sebanyak 528 aduan diterima di seluruh negara membabitkan kegiatan pengamal pergigian palsu dalam tempoh lima tahun bermula 2017 lalu.

"Trend kes ini menunjuk-



DR NOORMI (kiri) melawat gerai pameran selepas pelancaran kempen, semalam.

kan peningkatan dari 2014 hingga 2019 dan hanya menurun pada 2020 dan 2021 iaitu masing-masing 129 aduan dan 89 aduan.

"Penurunan mungkin disebabkan arahan Perintah Kawalan Pergerakan (PKP) akibat pandemik Covid-19 yang merencatkan pergerakan mereka. Kita, khuatir dengan pembukaan semula dan kehidupan hampir nor-

mal seperti sedia kala, kegiatan (doktor gigi palsu) ini akan mula semula," katanya.

Beliau berkata demikian selepas pelancaran Kempen Say No To Fake Dentists Bahagian Kesihatan Pergigian Jabatan Kesihatan Negeri Terengganu (JKNT) 2022, di sini, semalam.

Mengulas mengenai pecahan kes, Dr Noormi berkata,

377 kes atau 71.4 peratus membabitkan kes pendakap gigi palsu, 58 kes venir pergigian dan lain-lain kes seperti pembuatan gigi palsu, cabutan gigi dan pemutihan gigi sebanyak 93 kes.

Menurutnya, daripada 528 aduan diterima, 10 peratus pengamal perubatan palsu dengan kebanyakan mereka wanita sudah dikenakan tindakan.